

春秋集傳

圖天所贊也○穀梁傳諸侯之尊弟兄不得以屬通其
弟云者親之也親而奔之惡也○胡氏傳夫后子出奔
其父禍之而罪秦伯何也春秋以均愛望人父而以能
友責人兄父母有愛妾猶終身敬之不衰況兄弟乎兄
弟翕而後父母順矣故不曰公子而特稱秦伯之弟云
許氏曰人君愛子使之寵貴以庶亂
適是禍之也志秦后子以爲世戒

六月丁巳邾子華卒

晉荀吳帥師敗狄于大鹵

公羊穀梁
作大原

左氏傳晉中行穆子敗無終及羣狄于大原崇卒也將

戰魏舒曰彼徒我車所遇又阨以什共車必克困諸阨
又克請皆卒自我始乃毀車以為行五乘為三伍荀吳
之嬖人不肯即卒斬以徇為五陳以相離兩於前伍於
後專為右角參為左角偏為前拒以誘之狄人笑之未
陳而薄之大敗之○穀梁傳中國曰大原夷狄曰大鹵
號從中國名從主人

胡氏傳按六月宣王北伐之詩其詞曰薄伐獯豸至于大原而詩人

美之者謂不窮追遠討及封境而止也然則大原在禹服之內而狄人來侵攘斥宜矣其過在毀車崇卒以詐誘敵人而敗之非王者之師耳使後世車戰法亡崇尚步卒以變詐相高日趨苟簡皆此等啓之矣書敗狄譏之也○許氏曰亂世逐爭奇變滋起兵車重遲廢此此矣箕與交剛皆書晉人至是書卿帥師狄強而晉衰

也

秋莒去疾自齊入于莒莒展與出奔吳

公穀無與字

左氏傳莒展與立而奪羣公子秩公子召去疾于齊秋齊公子鉏納去疾展與奔吳○程氏傳去疾假齊之力以入莒討展與之罪正也故稱莒遂自立無所稟命故不稱公子自以爲公子可立也展與爲弑君者所立而以國氏者罪諸侯也號之會雖國亂未與然諸侯與其立矣故欲執叔孫也稱莒展與見諸侯之與其立也

叔弓帥師疆鄆田

左氏傳因莒亂也○杜氏注春取鄆令正其封疆○趙氏曰凡疆田而書帥師皆有難也○劉氏傳何以書譏何譏爾以亂為利也

葬邾悼公

冬十有一月己酉楚子麇卒

公穀麇作卷

左氏傳秋楚公子圍使公子黑肱伯州犂城犂櫟邾

邑

本鄭

鄭人懼子產曰不害令尹將行大事而先除二子

也冬楚公子圍將聘于鄭伍舉為介未出竟聞王有疾而還伍舉遂聘十一月己酉公子圍至入問王疾縊而

弑之遂殺其二子幕及平夏右尹子干出奔晉宮殿尹
子皙出奔鄭殺大宰伯州犂于郊葬王于郊謂之郊教
使赴于鄭伍舉問應爲後之辭焉對曰寡大夫圍伍舉
更之曰共王之子圍爲長○胡氏傳公子圍弑郊教而
以疾赴諸侯曷爲因而不革乎曰圍弑君以立中國力
所不加而莫能致討則亦已矣大合諸侯于申與會者
凡十有三國其臣舉六王二公之事其君用齊桓召陵
之禮宋向戌鄭子產諸侯之良也而皆有獻焉不亦傷
乎若革其僞赴而正以弑君將恐天下後世非獨以篡

弑之賊爲不必致討又可從之以主盟會而無惡矣聖人至此閔中國之衰微而不振懼人慾之橫流而莫遏是故察微顯權輕重因諸侯之策書而不正其篡弑之罪所以扶中國存天理也

楚公子比出奔晉

左氏傳公子圍弑楚子右尹子干出奔晉宮廋尹子皙出奔鄭○蘇氏曰君弑畏偏而出

二年春晉侯使韓起來聘

左氏傳晉侯使韓宣子來聘且告爲政而來見觀書於

大史氏見易象與魯春秋曰周禮盡在魯矣吾乃今知周公之德與周之所以王也

夏叔弓如晉

左氏傳叔弓聘于晉報宣子也

秋鄭殺其大夫公孫黑

左氏傳元年鄭徐吾犯之妹美公孫楚聘之矣

楚字子南公

孫黑又使強委禽焉犯懼告子產子產曰是國無政非子之患也唯所欲與適子南氏子皙怒旣而麇甲以見子南欲殺之而取其妻子南知之執戈逐之及衝擊之

以戈子皙傷而歸告大夫曰我好見之不知其有異志也故傷大夫皆謀之子產曰直鈞幼賤有罪罪在楚也乃執子南放之于吳六月丁巳鄭伯及其大夫盟于公孫段氏罕虎公孫僑公孫段游吉駟帶私盟于閨門之外實薰隧公孫黑強與於盟使大史書其名且曰七子子產弗討二年秋鄭公孫黑將作亂欲去游氏而代之位傷疾作而不果駟氏與諸大夫欲殺之子產在鄙聞之懼弗及乘遽而至使吏數之曰伯有之亂以大國之事而未爾討也爾有亂心無厭國不女堪專伐伯有而

罪一也

見襄三
十年

昆弟爭室而罪二也薰隧之盟女矯君

位而罪三也有死罪三何以堪之不速死大刑將至再
拜稽首辭曰死在朝夕毋助天爲虐子產曰人誰不死
凶人不終命也不速死司寇將至七月壬寅縊尸諸周
氏之衢加木焉○劉氏傳稱國以殺大夫者罪累上也
黑有罪其以累上言何惡鄭伯也何惡乎鄭伯言不能
討有罪以放乎亂也其放乎亂奈何公孫黑伐良霄而
逐之君弗誅也以爲大夫又與公孫楚爭娶徐吾氏徐
吾氏歸于楚君放楚也而盟諸大夫黑於是自以爲卿

又將爲亂疾作而卧子產使吏數詣其家則幸而勝之
爾

冬公如晉至河乃復

左氏傳晉少姜卒公如晉及河晉侯使士文伯來辭曰

非伉儷也請君無辱公還季孫宿遂致服焉

三年傳曰鄭游吉如

晉送少姜之葬梁丙張趯見之梁丙曰甚矣哉子之爲此來也子大叔曰將得已乎昔文襄之霸也其勢不煩諸侯令諸侯三歲而聘五歲而朝有事而會不協而盟君薨大夫弔卿共葬事夫人士弔大夫送葬無加命矣今嬖寵之喪不敢擇位而數於守適惟懼獲戾豈敢憚煩少齊有寵而死齊必繼室吾又將來賀不惟此行也張趯曰善哉吾得聞此數也然自今子其無事矣譬如火焉火中寒暑乃退此其極也能無退乎晉將失諸侯

諸侯求
煩不獲

○泰山孫氏曰公如晉至河乃復者六唯二十二

年書有疾明有疾而反餘皆譏公數如晉見距不能以

禮自重大取困辱也

劉氏意林曰道千乘之國至重也而動不以禮雖為之卑伏曲從猶

無益也適得輕焉吾以此觀之為國以禮者處勝人之地矣孔子曰恭而無禮則勞又曰事君數斯辱矣朋友數斯疏矣數猶數數也

○常山劉氏曰凡人君動止有

度豈可非禮而行又無故而乃復哉蓋進退皆非禮義

也

胡氏傳舉動人君之大節賢哲量之以行藏四隣視之以厚薄叢邪親之以作止故有國必謹而後動此

守身之本保國之基也禮雖自卑而尊人亦不妄悅人以自辱昭公不能據經守正失禮妄動是以進退失據

蓋習儀以亟而不明乎禮之大節也其及也宜

季孫宿如晉

泰山孫氏曰公如晉而距之季孫宿如晉而納之是昭

公季孫宿之不若也此晉侯之惡亦可見矣穀梁傳曰

不得入季孫宿如晉而得入惡季孫宿也○胡氏傳書公如晉至河乃復季

孫宿如晉而昭公失國之因季氏逐君之漸晉人下比

之迹不待貶絕而皆見矣

三年春王正月丁未滕子原卒公羊原

夏叔弓如滕五月葬滕成公

左氏傳叔弓如滕葬成公○許氏曰以吾之大夫往報

成公之會襄葬也春秋卒葬諸侯有大小之體有褒貶之義有盛衰之變有施報之情無非教也

秋小邾子來朝

左氏傳小邾穆公來朝季武子欲卑之穆叔曰不可曹滕二邾實不忘我好敬以逆之猶懼其貳又卑一睦焉逆羣好也其如舊而加敬焉季孫從之

八月大雩

左氏傳旱也

冬大雨雹

北燕伯款出奔齊

左氏傳燕簡公多嬖寵欲去諸大夫而立其寵人冬燕大夫比以殺公之外嬖公懼奔齊書曰北燕伯款出奔齊罪之也○胡氏傳君雖不君臣不可以不臣燕伯欲去諸大夫固不君矣而大夫相與比以殺其外嬖是威脅其主而出之也與鬻拳之兵諫無異而獨罪燕伯何哉大夫國君之陪貳以公心選之而不可私也以誠意委之而不可疑也以隆禮待之而不可輕也以直道御之而不可辱也否則是不忽其陪貳以自危矣晉厲公殺三

卻立胥童而弑於匠麗氏漢隱帝殺楊史立郭允明而
弑於蘇村衛獻公蔑冢卿而信其左右亦奔夷儀故人
主不尊陪貳而與賤臣圖柄臣者事成則失身而見弑
事不成則失國而出奔此有國之大戒也春秋凡見逐
於臣者皆以自奔爲文正其本之意

四年春王正月大雨雹

公穀雹作雪范氏注或作雹

左氏傳大雨雹季武子問於申豐曰雹可禦乎對曰聖
人在上無雹雖有不爲災古者日在北陸而藏冰西陸
朝覲而出之其藏冰也深山窮谷固陰沍寒於是乎取

之其出之也朝之祿位賓食喪祭於是乎用之其藏之也黑牡秬黍以享司寒其出之也桃弧棘矢以除其災其出入也時食肉之祿冰皆與焉大夫命婦喪浴用冰祭寒而藏之獻羔而啓之公始用之火出而畢賦自命夫命婦至于老疾無不受冰山人取之縣人傳之與人納之隸人藏之夫冰以風壯而以風出其藏之也周其用之也徧則冬無愆陽夏無伏陰春無淒風秋無苦雨雷出不震無雷霜雹癘疾不降民不夭札今藏川池之冰棄而不用風不越而殺雷不發而震雹之爲災誰能

之乃許楚使使叔向對曰寡君有社稷之事是以不獲
春秋時見諸侯君實有之何辱命焉楚子問於子產曰
晉其許我諸侯乎對曰許君晉君少安不在諸侯其大
夫多求莫匡其君在宋之盟又曰如一若不許君將焉
用之王曰諸侯其來乎對曰必來從宋之盟承君之驩
不畏大國何故不來不來者其魯衛曹邾乎曹畏宋邾
畏魯魯衛偏於齊而親於晉唯是不來其餘君之所及
也夏諸侯如楚魯衛曹邾不會曹邾辭以難公辭以時
祭衛侯辭以疾鄭伯先待於申六月丙午楚子合諸侯

于申椒舉言於楚子曰臣聞諸侯無歸禮以爲歸今君始得諸侯其慎禮矣霸之濟否在此會也夏啓有鈞臺之享商湯有景亳之命周武有孟津之誓成有岐陽之蒐康有鄴宮之朝穆有塗山之會齊桓有召陵之師晉文有踐土之盟君其何用宋向戌鄭公孫僑在諸侯之良也君其選焉王曰吾用齊桓王使問禮於左師與子產左師曰小國習之大國用之敢不薦聞獻公合諸侯之禮六子產曰小國共職敢不薦守獻伯子男會公之禮六王使椒舉侍於後以規過卒事不規王問其故對

曰禮吾所未見者有六焉又何以規楚子示諸侯侈椒
舉曰夫六王二公之事皆所以示諸侯禮也諸侯所由
用命也夏桀爲仍之會有緡叛之商紂爲黎之蒐東夷
叛之周幽爲大室之盟戎狄叛之皆所以示諸侯汰也
諸侯所由棄命也今君以汰無乃不濟乎王弗聽○杜
氏注胡國汝陰縣西北有胡城申南陽宛縣泰山孫氏曰姜姓國
○何氏注不殊淮夷者楚子主會故君子不殊其類○泰
程氏傳晉平公不在諸侯楚於是強爲伯者之事○泰
山孫氏曰中國自宋之會政在大夫諸侯不見者十年

此書楚子蔡侯陳侯鄭伯許男徐子滕子頤子胡子沈
子小邾子宋世子佐淮夷會于申者楚子大合諸侯于
此也楚子得以大合諸侯于此者桓文既死中國不振
喪亂日甚幅裂橫潰制在夷狄故也故自是天下之政
中國之事皆夷狄迭制之至于平丘召陵之會諸侯雖
云再出尋復叛去不足道也

呂氏曰楚子爲主大會諸侯淮夷與焉夷狄之強而

中國之無政也可知矣然自襄公三年雞澤之會諸侯
同盟矣而叔孫豹始及諸侯之大夫及陳袁僑盟襄十
六年溴梁之會獨大夫盟諸侯不與也至襄二十七年
宋之會大夫自會爾諸侯不往也此歲會于申諸侯始
復而楚子主之淮夷與焉天下之事可知矣

○胡氏傳申之會楚子爲主而

不殊淮夷是在會諸侯皆狄也其意也何楚虔弑麇以
立而求諸侯於晉晉人許之中國從之執徐子圍朱方
遷賴於邠城竟莫校畏其強盛則曰晉楚惟天所相不
可與爭滅陳不能救則曰陳亡而楚克有之天道也滅
蔡而又不能救則曰天將棄蔡以壅楚而降之罰也至
使窮凶極惡師潰于訾梁身竄于棘里而縊於申亥氏
人不致討而天自討之是責命于天以人事爲無益而
弗爲也而可乎弑君之賊在春秋時有臣子討之則衛
人殺州吁是也有四鄰討之則蔡人殺陳佗是也臣子

不能討之於內四鄰不能討之於外有與之會以定其
位則齊侯及魯宣公會于平州是也有受其賂以免於
討則晉侯及諸國會于扈是也然至此極矣則未有不
以爲賊而又推爲盟主相與朝事之以聽順其所爲而
不敢忤者也故申之會不殊淮夷者以在會諸侯皆爲
夷狄之行皆王法所當斥而不使夏變於夷之意也

楚人執徐子

左氏傳徐子吳出也以爲貳焉故執諸申

言楚子以疑罪執諸侯

秋七月楚子蔡侯陳侯許男頓子胡子沈子淮夷伐吳

左氏傳秋七月楚子以諸侯伐吳宋太子鄭伯先歸宋
華費遂鄭大夫從

執齊慶封殺之

左氏傳使屈申圍朱方八月甲申克之執齊慶封而盡
滅其族將戮慶封叔舉曰臣聞無瑕者可以戮人慶封
唯逆命是以此其肯從於戮乎播於諸侯焉用之王
弗聽負之斧鉞以徇於諸侯使言曰無或如齊慶封弑
其君弱其孤以盟其大夫慶封曰無或如楚共王之庶
子圍弑其君兄之子麇而代之盟諸侯王使速殺之

○穀梁傳慶封其以齊氏何也爲齊討也慶封弑其君而不以弑君之罪罪之者慶封不爲靈王服也不與楚討也春秋之義用貴治賤用賢治不肖不以亂治亂也孔子曰懷惡而討雖死不服其斯之謂與

春秋書殺他國大夫之法有二凡有罪而當誅者書曰某人殺某若楚人殺陳夏徵舒是也無罪而不服者書執而殺之若執蔡世子有以歸用之楚人執行人千徵師殺之是也慶封有與弑其君之罪楚子殺之宜也不曰殺齊慶封而曰執齊慶封殺之者楚靈

有諸已而非諸人是以慶封不服而春秋亦不得純以討賊之法書之也

遂滅賴

公穀賴作厲

左氏傳遂以諸侯滅賴遷賴于鄢楚子欲遷許於賴使鬬韋龜及公子棄疾城之而還申無宇曰楚禍之首將在此矣召諸侯而來伐國而克城竟莫校王心不違民其居乎

言將有事不得安也

民之不處其誰堪之不堪王命乃禍亂也○穀梁傳遂繼事也○許氏曰惡其因義而為利以惡終也

九月取鄆

左氏傳莒亂著丘公立而不撫鄆鄆叛而來

許氏曰使鄆叛而來

不用師徒則書之之辭必有異矣謂之鄆不附莒故魯得易而取之則可爾

○泰山孫氏曰

按襄六年莒人滅鄆此言取鄆者蓋莒滅鄆以爲附庸今魯取之

冬十有二月乙卯叔孫豹卒

左氏傳初穆子去叔孫氏及庚宗遇婦人使私爲食而宿焉適齊娶于國氏生孟丙仲壬及宣伯奔齊魯人召之歸既立所宿庚宗之婦人獻以雉問其姓對曰余子

長矣能奉雉而從我矣召而見之名之曰牛遂使爲豎
有寵長使爲政公孫明知叔孫於齊歸未逆國姜子明
取之故怒其子長而後使逆之田於丘猶遂遇疾焉豎
牛欲亂其室而有之強與孟盟不可譖諸叔孫使拘而
殺諸外又強與仲盟不可逐之奔齊疾急命召仲牛許
而不召杜泄見告之飢渴授之戈對曰求之而至又何
去焉豎牛曰夫子疾病不欲見人使寘饋于个而退牛
弗進則置虛命徹十二月癸丑叔孫不食乙卯卒牛立
昭子而相之五年仲至自齊季孫欲立之南遺曰叔孫

氏厚則季氏薄彼實家亂子勿與知不亦可乎南遺使
國人助豎牛攻諸大庫之庭司宮射之中目而死豎牛
取東鄙三十邑以與南遺昭子即位朝其家衆曰豎牛
禍叔孫氏使亂大從殺適立庶又披其邑將以赦罪罪
莫大焉必速殺之豎牛懼奔齊孟仲之子殺諸塞關之
外仲尼曰叔孫昭子之不勞不可能也周任有言曰爲
政者不賞私勞不罰私怨

五年春王正月舍中軍

左氏傳季孫謀去中軍豎牛曰夫子固欲去之正月舍

中軍卑公室也毀中軍于施氏成諸臧氏

季孫不欲觀其議初二家

諸大夫發毀置之計又取其令名

初作中軍三分公室而各有其一季

氏盡征之叔孫氏臣其子弟孟氏取其半焉及其舍之

也四分公室季氏擇二二子各一皆盡征之而貢于公

罷中軍季孫攝左師孟氏攝右師叔孫氏自以叔孫爲軍名三家各有一軍家屬季孫無所入於公叔孫以父

兄歸公孟氏復以子弟之半歸公今季氏簡以父擇取二國人盡爲三家三家隨時獻公而已以書使杜

泄告於叔孫之嬪曰子固欲毀中軍既毀之矣故告杜

泄曰夫子唯不欲毀也故盟諸僖閔詛諸五父之衢受

其書而投之帥士而哭之○胡氏傳三軍作舍皆自三

家公不與焉公室益卑而魯國之兵權悉歸于季氏矣
兵權有國之司命三綱軍政之本原書其作舍而公孫
于齊薨于乾侯定公無正必至之理也已則不臣三綱
淪替南遺叛陽虎專季斯因而三桓子孫微矣亦能免
乎書曰舍中軍微辭以著其罪也○襄陵許氏曰叔孫
豹卒而毀中軍則公若寄矣以是知豹之有力於公室
所謂剝之无咎者歟名舍中軍而實欲變亂大正以盡
公室作之自己舍之自己惡季氏也

石氏曰襄十一年作三軍季孫作之

也此年舍中軍季孫舍之也作之舍之皆非天子之命又以卑公室其作之也公室之所征者叔孫氏之父兄

與孟氏之半而已及舍之也公室之所得者三家之貢而已故作三軍公室之征猶得五舍中軍公室不復有矣作三軍卑公室之漸舍中軍卑公室之極此所以兩書之非重其能復古也

楚殺其大夫屈申

左氏傳楚子以屈申爲貳於吳乃殺之以屈生爲莫敖

○劉氏傳稱國以殺大矢者罪累上也屈申之累上奈何楚人仇吳而疑屈申謂屈申貳於吳也而殺之然則屈申之罪何屈申之爲人臣也君弑則不能討國亂則不能去北面而事寇讎足以殺其身而已矣

許氏曰春秋刑按見

惡惡以疑罪殺人簡易之道也

公如晉

左氏傳公如晉自郊勞至于贈賄無失禮晉侯謂女叔齊曰魯侯不亦善於禮乎對曰魯侯焉知禮公曰何為自郊勞至于贈賄禮無違者何故不知對曰是儀也不可謂禮禮所以守其國行其政令無失其民者也今政令在家不能取也有子家駒弗能用也奸大國之盟陵虛小國謂伐莒取鄆利人之難往平莒亂而取鄆不知其私不自知有私難公室四分民食於他他謂三家思莫在公不圖其終為國君難將及身不恤其所禮之本末將於此乎在在恤民憂國而

屑屑焉習儀以亟

以習儀為急

言善於禮不亦遠乎

夏官阜夷以牟婁及防茲來奔

左氏傳言牟夷以牟婁及防茲來奔牟夷非卿而書尊

地也

范氏曰竊地之罪重故不得不錄其人

○杜氏注防茲城陽平昌縣

西南有防亭姑幕縣東北有茲亭○公羊傳其言及防

茲來奔何不以私邑累公邑也

呂氏曰言牟夷以牟婁及防茲來奔事與襄二

十一年邾庶其以濞閭丘來奔罪同而魯受之惡自見矣濞閭丘不言及牟婁及防茲何以言及牟婁牟夷之

私邑防茲則他邑也故言及

○胡氏傳邾宮之大夫名姓不登於史

策微也牟夷言大夫曷為以姓氏通重地也以地叛雖

賤必書地以名其人終爲不義弗可滅矣其書來奔是
接我以利而我入其利兩譏之也爲國以義不以利如
以利則上下交征而國危矣爲己以義不以利如以利
則患得患失亦無所不至矣春秋於三叛人雖賤必書
其名以懲不義懼淫人爲後戒也○襄陵許氏曰卿會
楚方盟而伐莒取鄆公如晉未反而受莒牟婁及防茲
惡季氏之專也

秋七月公至自晉

左氏傳莒人愬于晉晉侯欲止公范獻子曰不可人朝

而執之誘也討不以師而誘以成之情也爲盟主而犯此二者無乃不可乎請歸之間而以師討焉乃歸公七月公至自晉

戊辰叔弓帥師敗莒師于蚡泉

蚡公羊作潰穀梁作貫

左氏傳莒人來討不設備戊辰叔弓敗諸蚡泉莒未陳也○杜氏注魯地○泰山孫氏曰魯旣受莒叛人邑又敗莒師于蚡泉其惡可知也

秦伯卒

左氏傳秦后子復歸于秦景公卒故也

冬楚子蔡侯陳侯許男頓子沈子徐人越人伐吳

左氏傳四年冬吳伐楚入棘櫟麻以報朱方之役五年

冬十月楚子以諸侯及東夷伐吳以報棘櫟麻之役遂

射以繁揚之師會于夏汭

會楚子

越大夫常壽過帥師會

楚子于瑱聞吳師出遂啓彊帥師從之遽不設備吳人

敗諸鵲岸

盧江舒縣有鵲尾渚

楚子以駟至于羅汭吳子使其弟

蹶由犒師楚人執之楚師濟羅汭沈尹赤會楚子次于

萊山遂射帥繁陽之師先入南懷楚師從之及汝清吳

不可入楚子遂觀兵坻箕之山是行也吳早設備楚無

功而還以蹶由歸楚子懼吳使沈尹射待命于巢遂啓
彊待命于雩婁○杜氏注越國會稽山陰縣○胡氏傳
越始見經而與徐皆得稱人何也吳以朱方虺齊慶封
而富於其舊崇惡也楚圍朱方執齊慶封殺之討罪也
吳不顧義入棘櫟麻以報朱方之役狄道也楚於是
以諸侯伐吳則比吳爲善而師亦有名其從之者進而稱
人可也或者以詞爲主而謂不可云沈子徐越伐吳故
特稱人誤矣以不可爲文詞而進人於越一字褒貶義
安在乎

六年春王正月杞伯益姑卒

左氏傳杞文公卒弔如同盟禮也

再同盟魯怨杞因晉取其田而不廢喪紀

故禮之

葬秦景公

左氏傳大夫如秦葬景公禮也

夏季孫宿如晉

左氏傳季孫宿如晉拜宮田也

葬杞文公

宋華合比出奔衛

左氏傳宋寺人柳有寵太子佐惡之華合比曰我殺之
柳聞之乃坎用牲埋書而告公曰合比將納亡人之族
既盟于北郭矣公使視之有焉遂逐華合比合比奔衛
於是華夷欲代右師乃與柳比從而爲之徵曰聞之久
矣公使代之

亡人華臣也襄十七年奔衛夷合比弟

見於左師左師曰女

夫也必亡女喪而宗室於人何有人亦於女何有○襄
陵許氏曰經書宋公殺其世子痤宋華合比出奔衛皆
著寺人讒慝以爲世戒而秦漢以來庸君衰季溺心嬖
習遠去忠良亂亡相屬若出一軌春秋惡可一日而不

開明哉○胡氏傳宋公寵信閹寺殺世適座而父子之
恩絕逐華合比而君臣之義睽刑人之能敗國亡家亦
可畏矣猶有任趙高以亡秦信恭顯十常侍以亡漢寵
王守澄田令孜以亡唐而不知鑒覆車之轍者不亦悲
夫凡此類直書而義自見矣

秋九月大雩

左氏傳旱也

楚遠罷帥師伐吳

左氏傳徐儀楚聘于楚楚子執之逃歸懼其叛也使蓬

泄伐徐吳人救之令尹子蕩帥師伐吳師于豫章而次

于乾谿

乾谿在譙國城父縣南楚東竟

吳人敗其師于房鍾

吳地

獲宮殿

尹棄疾子蕩歸罪於蘧泄而殺之○襄陵許氏曰敗楚師者非蘧泄也而泄伏其誅故書蘧罷伐吳以正之楚再不競於吳乃弭兵鋒有事陳蔡至復伐徐而國亂矣吳蓋自是休兵息民國始寢強

冬叔弓如楚

左氏傳叔弓如楚聘且弔敗也○襄陵許氏曰四年公不會申既而震楚兵威將朝楚而未能故以叔弓先聘

明年而躬繼之也

齊侯伐北燕

左氏傳齊侯如晉請伐北燕晉侯許之十二月齊侯遂伐北燕將納簡公晏子曰不入燕有君矣民不貳吾君賄左右諂諛作大事不以信未嘗可也七年正月癸巳齊侯次于號燕人行成曰敝邑知罪敢不聽命先君之敝器請以謝罪公孫皙曰受服而退侯釁而動可也二月戊午盟于濡上燕人歸燕姬賂以瑤璆玉櫝罍耳不克而還

七年春王正月暨齊平

穀梁傳平者成也暨猶暨暨也暨者不得已也以外及

內曰暨

陸氏微音曰爾雅曰暨及也又曰暨不及據實言之及是齊人及魯平非魯欲之不可言會齊

平不可言齊及我平故書曰暨以明外及內且非魯之志也○高郵孫氏曰暨不得已也齊來求平不得已而許之故曰暨且

○襄陵許氏曰襄公之世齊數伐魯至

明非魯志也

齊景公一使慶封來聘而不書魯報至是乃暨齊平○

劉氏傳暨人以平非禮也蓋強之也

胡氏傳我所欲曰及不得已曰暨當

是時昭公結昏強吳外附荆楚其與齊平無汲汲之意乃齊求於魯而許之平也故曰暨至定公八年魯再侵齊結大國之怨見復必失其與齊平非不得已乃魯求於齊而欲其平也故曰及平者聖人之所貴然或以賄

賂而結平或以臣下而擅平或以附夷狄而得平或以
侵犯大國而急於平皆罪也改其事而輕重見矣○意
林曰齊大魯小魯為齊弱久矣然而能暨齊以平者介
於楚也夫不自計德之厚薄勢之利害而惜人之威以
憑諸侯是以遠者不服近者不親此最得失之機也案
夷狄侮中國昭公之棄其國死於外諸侯莫之救也從
此生矣

三月公如楚

左氏傳楚子成章華之臺願與諸侯落之大宰遽啓彊
曰臣能得魯侯遽啓彊來召公辭曰昔先君成公命我
先大夫嬰齊曰吾不忘先君之好將使衛父照臨楚國
嬰齊受命于蜀

蜀盟在成二年

我先君共王引領北望日月以

異傳序相授於今四王矣嘉惠未至唯襄公之辱臨我
喪今君若步王趾辱見寡君寵靈楚國以信蜀之役是
寡君既受貺矣何蜀之敢望君若不來使臣請問行期
問魯見
伐之期寡君將承質幣而見于蜀以請先君之貺三月
公如楚

叔孫婁如齊涖盟

婁公羊作舍涖
公穀文從婁

穀梁傳莅位也內之前定之辭謂之莅外之前定之辭
謂之來○襄陵許氏曰始暨齊平故盟以結好

夏四月甲辰朔日有食之

秋八月戊辰衛侯惡卒

立九年

穀梁傳卿曰衛齊惡

在元年

今日衛侯惡此何爲君臣同

名也君子不奪人名不奪人親之所名重其所以來也

王父名子也

親之所名臣雖欲改君不當聽欲使人重父命也父受名于王父王父改則稱王父

命名之

九月公至自楚

冬十有一月癸未季孫宿卒

左氏傳季武子卒○襄陵許氏曰季武子相魯作三軍

舍中軍唯已所利取鄆潰盟敗諸侯約幾陷名卿以爲

國憂則知昭公乾侯之禍此其專欲不息之習非一日也

十有二月癸亥葬衛襄公

八年春陳侯之弟招殺陳世子偃師夏四月辛丑陳侯溺卒

左氏傳陳哀公元妃鄭姬生悼大子偃師二妃生公子留下妃生公子勝二妃嬖留有寵屬諸司徒招與公子過哀公有廢疾三月甲申公子招公子過殺悼大子偃師而立公子留夏四月辛亥哀公縊○穀梁傳鄉曰陳

公子招今曰陳侯之弟招何也曰盡其親所以惡招也
兩下相殺不志于春秋此其志何也卅子者唯君之貳
也云可以重之存焉志之也諸侯之尊弟兄不得以屬
通其弟云者親之也親而殺之惡也○陸氏微旨稱弟
以殺大子旣罪其逆且言骨肉相殘又議陳侯失教也
○孫氏發微其曰陳侯之弟招殺陳卅子偃師親之者
所以甚招之惡也招以叔父之親不顧宗社之重殞家
嗣以立庶孽致楚滅陳招之由也

常山劉氏曰招殺偃師旣曰陳侯之弟矣

又曰殺卅子何也曰夏四月陳侯溺卒則是陳侯旣病可知矣招乘間殺君之嗣適欲取其國蓋不特骨肉相

也○胡氏傳此公子招特以弟稱者著招過寵檢惡而陳侯失親親之道也招固有罪矣陳侯信愛其弟何以爲失親親乎尊賢者親親之本不能擇親之賢者厚加尊寵以表公族而徇其私愛施於不令之人以至亡國敗家豈不失親親之道乎其曰陳侯之弟招殺陳世子偃師交貶之也○襄陵許氏曰陳哀寵其庶子資以強輔而濟之權以軋大子使之失職至於亂作躬受其禍惟其暱愛法不勝私也悲夫

叔弓如晉

左氏傳晉侯築虢祁之宮叔弓如晉賀虢祁也游吉相
鄭伯以如晉亦賀虢祁也史趙見子大叔曰甚哉其相
蒙也可弔也而又賀之○襄陵許氏曰財費廣侈則國
貧力役煩勞則民敝締構彫琢輪奐之功盛則恭儉純
茂之德衰矣此之謂可弔者也而諸侯賀之是以人君
得意海內則安於亂亡而不自知蓋諛之者衆也志叔
弓如晉是已當楚之隆勢專諸夏而晉弗慮圖唯宮室
之崇以爲安榮平公其可謂志卑矣

楚人執陳行人干徵師殺之陳公子留出奔鄭

左氏傳千微師赴于楚且告有立君公子勝愬之于楚
楚人執而殺之公子留奔鄭書曰楚人執陳行人千微
師殺之罪不在行人也○穀梁傳稱行人怨接於上也
○劉氏傳稱人以執者非伯討也此其爲非伯討奈何
楚人惡公子招而殺千微師非其罪也古者兵交使在
其間可也○蘇氏曰楚將討陳故留出奔留旣爲君矣
不曰陳留而曰陳公子留何也留立於招耳未成爲君
也

秋蒐于紅

左氏傳秋大蒐于紅自根卒至于商衛革車千乘大蒐數軍

實簡車馬也根卒魯東界商宋地齊西○杜氏注紅魯界接宋衛也言千乘見魯眾之大數

地沛國蕭縣西有紅亭遠疑○穀梁傳因蒐狩以習武

事禮之大者也艾蘭以為防防為田置旃以為轅門旃旗

旗之名周禮通帛為旃以爲葛覆質以為槩質槩也槩門中象流

旁握御轡者不得入流旁握謂車兩轆頭各支門達容

車軌塵塵不馬候蹄發足相應揜揜速相投拊禽旅拊取御者不失

其馳然後射者能中不失馳過防弗逐不從奔之道也

戰不逐面傷不獻嫌誅不成禽不獻惡殺禽雖多天子

取三十焉其餘與士衆習射於射宮

取三十以共乾豆賓客君之庖射宮

擇射而中田不得禽則得禽田得禽而射不中則不得

禽是以知古之貴仁義而賤勇力也○劉氏傳蒐春事

也秋興之非正也蒐有常地矣于紅亦非正也然則曷

為不言公公不得與於蒐爾公曷為不得與於蒐三家

者專魯而分之政令出焉公民食焉爾

意林曰紅之蒐吾見其反天時

矣易地理矣悖人倫矣

陳人殺其大夫公子過

左氏傳陳公子招歸罪於公子過而殺之

言招所以不死而得放

大雩

冬十月壬午楚師滅陳執陳公子招放之于越殺陳孔奐

左氏傳九月楚公子弃疾帥師奉孫吳圍陳

孫吳悼大子偃師之

子宋戴惡會之十一月壬午滅陳

襄三十年鄭子產如陳蒞盟歸告大夫曰

陳亡國也不可與也衆禾黍繕城郭恃此二者而不撫其民其君弱植公子侈大子卑大夫教政多門以介於大國能無亡乎

○殺梁傳惡楚子也○呂氏曰公子招

殺卅子矣而放之越孔奐不知其罪而殺之淫刑不道

甚也

按杜氏注云吳招之黨他無所見蓋杜氏意料之辭耳然自宋之盟見於經執陳國之政以吳視君

之亂從君於昏而無所正故蓋不能爲有無者也雖有罪必不加於招矣錄楚之放招而殺吳蓋以見楚子滅

人之國而以私意放殺其臣初不問其罪之輕重殺梁子所謂惡楚子者得其旨矣

葬陳哀公

左氏傳與嬖袁克殺馬毀玉以葬楚人將殺之請寘之既又請私私於幄加絰於顙而逃○穀梁傳曰不與楚滅閔之也○泰山孫氏曰十月壬午楚師滅陳此言葬陳哀公如不滅之辭者楚子葬之也不言楚子葬之者不與楚子滅陳葬哀公故以陳人自葬爲文所以存陳也

九年春叔弓會楚子于陳

左氏傳叔弓宋華亥鄭游吉衛趙厲會楚子于陳楚子在陳

故四國大夫往不行會禮故不總書○襄陵許氏曰楚既滅陳威震諸夏

是以無所號召而諸國之大夫會之

許遷于夷

左氏傳二月庚申楚公子棄疾遷許于夷實城父此時敗城

父為夷故傳實之取州來淮北之田以益之○杜氏注城父屬潁南

許畏鄭欲遷故以自遷為文

夏四月陳災災公穀並作火

公羊傳陳已滅矣其言陳火何存陳也曰存陳恠矣滅

人之國執人之罪人殺人之賊葬人之君若是則存陳
怖矣○胡氏傳凡外災告則書今楚人滅陳夷於屬縣
使穿封成爲公矣必不遣使告於諸侯言亡國之有天
災也何以書於魯國之策乎當是時叔弓與楚子會于
陳則目擊其事矣雖彼不來告此不往弔叔弓使畢而
歸語陳故也魯史遂書之爾或曰國史所書必承赴告
豈有憑使人之言而載之於史者曰周景王崩有尹軍
猛朝之變固無赴告矣叔鞅至自京師言王室之亂也
春秋承其言遂書於策亦此類爾仲尼作經存而弗革

者蓋與滅國繼絕世以堯舜三代公天下之心爲心異
於孤秦罷侯置守欲私一人以自奉者所以歸民心合
天德也公年穀梁以爲存陳得其旨矣

秋仲孫貜如齊

左氏傳孟僖子如齊殷聘禮也

自叔老聘齊至今二十
年禮意又曠今脩盛聘

以無忘舊
好故曰禮

冬築卽圉

左氏傳築卽圉季平子欲其速成也叔孫昭子曰詩曰
經始勿亟庶民子來焉用速成其以勦民也無圉猶可

無民其可乎○襄陵許氏曰公內制於強臣外輕於大國亂亡危辱兆矣是之弗慮而築卽園不時孰甚焉蒐田築園知公之志日以荒也

以左氏觀之有以見李孫意如逢其君以耳目之娛而日竊其權昭公安之而莫之悟也人君於此可不戒哉

春秋卷第二十一

春秋卷第二十二

張洽集傳

昭公

十年春王正月

夏齊欒施來奔

齊公羊作晉非

左氏傳齊惠欒高氏皆耆酒信內多怨彊於陳鮑氏而惡之夏有告陳桓子曰子旗子良將攻陳鮑亦告鮑氏桓子授甲而如鮑氏遭子良醉而騁遂見文子則亦授甲矣使視二子則皆飲酒桓子曰彼雖不信聞我授甲則必逐我及其飲酒也先伐諸陳鮑方睦遂伐欒高氏

子良曰先得公陳鮑焉往遂伐虎門公卜使王黑以靈
姑鉞率吉請斷三尺焉而用之五月庚辰戰于稷欒高
敗又敗諸莊國人追之又敗諸鹿門欒施高彊來奔

秋七月季孫意如叔弓仲孫矍帥師伐莒

意如公羊作
隱如後並同

左氏傳季平子伐莒取郕獻俘始用人於亳社

以人祭
商社

臧武仲在齊聞之曰周公其不饗魯祭乎○胡氏傳前

已舍中軍矣曷爲猶以三卿並將乎季氏毀中軍四分
公室擇其二二家各有其一至是季孫意如身爲主將
二子各率一軍爲之副則三軍固在其曰舍之者特欲

中分魯國之衆爲己私耳以爲復古則誤矣襄公以來
既作三軍地皆三家之土民皆三家之兵每一軍出各
將其所屬而公室無與焉是知雖舍中軍而三卿並將
舊額固存矣○杜氏注取鄭不書公見討於平丘故諱
之

戊子晉侯彪卒

左氏傳晉平公卒鄭伯如晉及河晉人辭之游吉遂如
晉

九月叔孫婼如晉葬晉平公

左氏傳九月叔孫婼齊國弱宋華定衛北宮喜鄭卒虎
許人曹人莒人邾人滕人薛人杞人小邾人如晉葬平
公也

十有二月甲子宋公成卒

公羊成
作成

左氏傳宋平公卒○杜氏注無冬闕文

十有一年春王二月叔弓如宋葬宋平公

二月公羊
作正月

左氏傳叔弓如宋葬平公也

夏四月丁巳楚子虔誘蔡侯般殺之于申

左氏傳楚子在申召蔡靈侯靈侯將往蔡大夫曰王貪

而無信唯蔡於感

恨也

今幣重而言甘誘我也不如無往

蔡侯不可三月丙申楚子伏甲而饗蔡侯于申醉而執

之夏四月丁巳殺之刑其士七十人○公羊傳楚子虔

何以名絕曷爲絕之爲其誘討也此討賊也雖誘之則

曷爲絕之懷惡而討不義君子不與也

穀梁傳何爲名之也夷狄之君

誘中國之君而殺之故謹而名之也

○陸淳微旨曰般弑君父之賊也誘

而殺之何爲其不可乎楚子內利其國外託討罪故不

許其誘而責其詐也夫以大國之力而討小國之逆當

聲其罪而伐之唱大義於天下今乃幣重言甘誘而殺

之雖曰討賊實取其國蔡侯之罪自不容誅楚子之惡

亦已甚矣故聖人名之言其非人君也

胡氏傳世子般弑其君諸侯與

通會盟十有三年矣是中國變為夷狄而莫之覺也楚子若以大義唱天下奉詞致討執般於蔡討其弑父與君之罪殘其身溺其宮室謀於蔡衆置君而去雖古之征暴亂者不越此矣又何惡乎今度本心欲圖其國不爲討賊舉也而又挾欺毀信重幣甘言詐誘其君執而殺之肆行無道貪得一時流毒於後棄疾以是殺我蠻商鞅以是給魏將秦人以是劫懷王傾危成俗天下大亂劉項之際死者十九聖人深惡楚度而名之也其慮遠矣後世誅討亂臣者或畏其強或幸其弱不以大義興師至用譎謀詐力傲倖勝之若事之捷反側皆懼苟其不捷適足長亂如代宗之圖思明憲

宗之給王弁昧於春秋垂戒之旨矣
○陸淳纂例曰

兩書名俱罪之也○穀梁傳稱月稱日稱地謹之也

楚公子弃疾帥師圍蔡

左氏傳楚公子弃疾圍蔡韓宣子問於叔向曰楚其克乎對曰克哉蔡侯獲罪於其君而不能其民天將假手于楚以斃之何故不克然肝聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其國雖幸而克必受其咎弗能久矣○陸渾微旨曰棄疾不能諫止而又帥師圍蔡從君於昏亦已甚矣此亦不待貶絕而惡見者也

五月甲申夫人歸氏薨

杜氏注昭公母胡女歸姓

大蒐于比蒲

公羊傳大蒐者何簡車徒也何以書蓋以罕書也○劉氏傳常事不書此何以書譏何譏爾喪不貳事夫人歸氏薨大蒐于比蒲非禮也羊舌肸曰魯君其亡乎有三年之喪而無一日之感○胡氏傳其曰大蒐越禮也君有重喪國不廢蒐不怠君也三綱軍政之本君執此以馭其下臣執此以事其上政之大本於是乎在君有三年之感而國不廢一日之蒐則無本矣然則君有重喪

喪不貳事以簡車徒爲非禮也乃有身從金革而無避
者獨何與曰喪不貳事大比而簡車徒則廢其常可也
有門庭之寇而宗廟社稷之存亡係焉必從權制而無
避矣伯禽服喪徐夷並興至于東郊不開出戰之師與
築城之役同日並舉度緩急輕重蓋有不得已焉者矣
晉王克用薨梁兵壓境而莊宗決勝於夾寨周太祖殂
契丹入寇而世宗接戰於高平若此者君行爲顯親非
不顧也臣行爲愛君非不忌也唯審於輕重緩急之宜
斯可矣

仲孫獲會邾子盟于侵祥

侵祥公羊作侵羊

左氏傳齊歸薨大蒐于比蒲非禮也孟僖子會邾莊公

盟于侵祥修好禮也

蒐非存亡之由故臨喪不宜爲之盟會以安社稷故喪盟謂之禮

○杜氏注侵祥地闕

秋季孫意如會晉韓起齊國弱宋華亥衛北宮佗鄭罕虎

曹人杞人于厥憇

公羊作屈銀

左氏傳楚師在蔡晉荀吳謂韓宣子曰不能救陳又不能救蔡物以無親晉之不能亦可知也已爲盟主而不恤亡國將焉用之秋會于厥憇謀救蔡也鄭子皮將行

子產曰行不遠不能救蔡也蔡小而順楚大而不德
天將棄蔡以壅楚盟而罰之蔡必亡矣且喪君而能守
者鮮矣晉人使狐父請蔡于楚弗許○襄陵許氏曰蔡
能嬰城堅不下楚此易助也而厥慙合天下之兵畏不
敢救遣使請命示之不能使楚益驕有以量中國之力
而卒取之此韓起之罪也卿不足書而書者中國不競
苟有善意斯存之矣蓋自是後春秋之譏世益畧不得
復以禮義望諸侯之君臣矣去贊至於失劇之末海水
羣飛蔽于天杭故志事而無譏焉者終不可語之義聞

一譏之者存不忍弃之仁也

胡氏傳文十五年晉靈公帥八國之諸侯盟于扈春

秋畧而不序者謀伐齊而不克定其乱也襄三十年叔孫豹會十二國之大夫于澶淵諸國之大夫皆稱人魯卿諱而不書者視蔡乱而不能討其賊也今楚將滅蔡請于楚而弗許晉之不能亦可知矣蜀為諸國猶序而大夫無敗乎扈之盟晉侯受賂弗克而還諸侯畧而不序亡義利之分也澶淵之會謀救宋災而不討蔡罪大夫貶而稱人魯卿諱而不書失輕重之別也亡義利之分為不仁失輕重之別為不智今晉與諸侯心欲救蔡而力弗加焉則無惡也凡此見春秋明義利審輕重以恕待人而不求其備矣

九月己亥葬我小君齊歸

左氏傳葬齊歸公不感叔向曰魯公室其卑乎君有大喪國不廢蒐有三年之喪而無一日之感國不恤喪不

忌君也君無憾容不顧親也國不忌君君不顧親能無
卑乎殆其失國○公羊傳齊歸者何昭公之母也○杜
氏注齊謚

冬十有一月丁酉楚師滅蔡執蔡世子有以歸用之

有穀梁作

友

左氏傳楚子滅蔡用隱天子于岡山申無宇曰不祥五
牲不相為用况用諸侯乎王必悔之楚子城陳蔡不羹

襄城縣東南有不羹城
定陵西北有不羹亭

使棄疾為蔡公問於申無宇曰

棄疾在蔡何如對曰擇子莫如父擇臣莫如君鄭莊公

城櫟而寘子元焉使昭公不立臣聞五大不在邊五細

不在庭

言五官之長專盛過節則不可居邊細弱不勝任亦不可居朝廷

親不在外羈

不在內令棄疾在外鄭丹在內君其少戒王曰國有大

城何如對曰鄭京櫟實殺曼伯宋蕭亳實殺子游齊渠

丘實殺無知衛蒲戚實出獻公若猶是觀之則害於國

未大必折尾大不掉君所知也○穀梁傳此子也其曰

世子何也不與楚殺也一事注乎志惡楚子也○泰山

孫氏曰諸侯在喪稱子此言世子有者未立也按四月

楚子誘蔡侯般殺之圍蔡十有一月滅蔡執蔡世子有

以歸用之有窮迫危懼以至於死此未立可知也故曰
卅子○劉氏傳卅子猶卅卅子也靈公弑其君其子非
正也曷爲與之繼卅春秋之設辭也非其人之罪也蓋
其道之謂也楚子虔誘蔡侯般殺之卅子友守國楚師
圍之八月而克之不能服於是乎虐用之古者父母之
仇不與共天下寢苦枕戈終身則友之爲者盡於卅子
矣○胡氏傳內入國而以其君來外滅國而以其君歸
皆服而以之易辭也旣書滅蔡矣又書執蔡卅子有者
卅子無降服之狀強執以歸而虐用之也卅子繼卅以

有國之稱必以此稱蔡有者父母之仇不與共天下與民守國效死不降至於力屈就擒雇用其身而不顧也則友之爲世子之道得矣○師氏曰春秋書滅國者多矣未有如此其暴者聖人詳其始末而記之書誘書圍書執蓋以傷中國之微而深惡夷狄之暴也

十有二年春齊高偃帥師納北燕伯于陽

左氏傳高偃納北燕伯款于唐因其衆也

言因唐衆欲納之故得先

唐○杜氏注三年燕伯出奔齊高偃高偃玄孫陽即唐

燕別邑中山有唐縣不言于燕未得國都○劉氏傳諸

侯失國諸侯納之正也○呂氏曰北燕伯不名劉質夫以謂與襄二十五年衛侯入于夷儀同蓋國君非臣下所當逐入于夷儀納于陽不名以正其君臣之分也

三月壬申鄭伯嘉卒

左氏傳三月鄭簡公卒

夏宋公使華定來聘

左氏傳宋華定來聘通嗣君也

公如晉至河乃復

左氏傳齊侯衛侯鄭伯如晉朝嗣君也

晉昭公新立

公如晉

至河乃復取鄭之役在十莒人愬于晉晉有平公之喪

未之治也故辭公公子慙遂如晉

五月葬鄭簡公

杜氏注三月而葬速

楚殺其大夫成熊公羊作成然殺梁作成虎

左氏傳楚子謂成虎若敖之餘也遂殺之成虎今尹子王之孫與闕

氏同出於若敖或譖成虎於楚子成虎知之而不能行書曰楚

殺其大夫成虎懷寵也

秋七月

冬十月公子慙出奔齊

慙公羊作整

左氏傳季平子立而不禮於南蒯南蒯謂子仲吾出季氏而歸其邑於公子更其位我以費為公臣子仲許之叔仲小南蒯公子慙謀季氏慙告公而遂從公如晉南蒯懼不克以費叛如齊子仲還及衛聞亂逃介而先及郊聞費叛遂奔齊

楚子伐徐

左氏傳楚子狩於州來次于潁尾使蕩侯潘子司馬督罷尹午陵尹喜帥師圍徐以懼吳楚子次于乾谿以為

之援

晉伐鮮虞

左氏傳六月晉荀吳偽會齊師者假道於鮮虞遂入昔陽秋八月滅肥以肥子緜臯歸冬晉伐鮮虞因肥之役也○常山劉氏曰夫悖信明義中國之道也懷利尚詐夷狄之道也晉中國也鮮虞夷狄也晉悖中國之道反行夷狄之事故書曰晉伐鮮虞以狄之噫人之所以遠於夷狄者何哉惟在於義利誠偽之間耳中國一失則遂入於夷狄可不慎哉故春秋之法猶謹嚴於此也○

胡氏傳獻公假道於虞以滅虢因執虞公以師與人稱
之今晉雖爲護固可罪也而狄之不亦過乎楚奉孫吳
討陳因以滅陳誘蔡般殺之因以滅蔡晉人視其殘虐
莫能救則亦已矣而効其所爲以伐人國是中國居而
夷狄行也人之所以爲人中國之所以爲中國信義而
已矣一失則爲夷狄再失則爲禽獸禽獸逼人入將相
食自春秋末世至于六國亡秦變詐並興傾危成俗河
決魚爛不可壅而收之皆失信棄義之明驗也春秋謹
嚴於此制治未亂拔本塞源之意豈曰過乎

十有三年春叔弓帥師圍費

杜氏注南蒯以費叛故○左氏傳叔弓圍費弗克敗焉
平子怒令見費人執之以爲囚俘治區夫曰非也若見
費人寒者衣之飢者食之爲之令主而共其乏困費來
如歸南氏亡矣民將叛之誰與居邑若憚之以威懼之
以怒民疾而叛爲之聚也若諸侯皆然費人無歸不親
南氏將焉入矣平子從之費人叛南氏十四年南蒯奔
齊司徒老邾慮癸來歸費齊侯使鮑文子致之○陸氏
曰凡家臣以邑叛悉不書叛但書大夫圍之則邑叛可

知矣且罪大夫無政而使家臣得專邑而叛也克之不
書本非他國之邑也○胡氏傳費內邑也命上卿為主
將舉大衆圍其城若敵國然者家臣強大夫弱也語不
云乎有一言而可以終身行之者其恕矣夫已所不欲
勿施於人所惡於下者無以事上也所惡於上者無以
使下也然後家齊而國治矣季孫意如以所惡於下者
事上而不忠其君以所惡於上者使下而不禮於其臣
出乎爾者反乎爾宜南蒯之及此也春秋之法不書內
叛反求諸已而已矣其書圍費欲著其實不沒之也

劉氏

意林曰季康子患盜問於孔子孔子曰苟子之不欲雖
賞之不竊曰殺無道以就有道何如孔子曰子為政焉
用殺子欲善而民善矣故春秋未嘗不惡臣不臣子不
子也又察其本本治而未亂者有之矣天下所共棄也
本不治而未亂者是乃其理君子所宜自審者也使周
之王必無廢文武之法無過天之道諸侯雖大國孰敢
慢其上諸侯必無僭天子其大夫孰陵大夫必無脅其
君其陪臣孰叛故南蒯雖以費入齊而春秋未以叛誅
也事有本末法有原省季氏未得以叛名蒯則魯亦未
得以強討季氏魯未得以強討季氏則周亦未得以僭
絕魯其不正相承非一日之積矣衆人之治則以謂苟
君君臣臣焉可矣王者之術必將曰君不君臣不臣父
不父子不子正己而物
正乎此之謂王者之術

夏四月楚公子比自晉歸于楚弑其君虔于乾谿

難穀梁文從溪

左氏傳楚蘧氏之族及蘧居許圍蔡洧蔓成然皆王所

不禮也因羣喪職之族啓越大夫常壽過作亂圍固城

克息舟城而居之觀起之死也其子從在蔡事朝吳曰

今不封蔡蔡不封矣我請試之以蔡公之命召子干子

皙元年子干奔
晉子皙奔鄭及郊而告之情強與之盟入襲蔡蔡公

將食見之而逃不知其故
驚而辟之觀從使子干食坎用牲加書

而速行並偽與蔡公盟
之微駭以示衆已徇於蔡曰蔡公召二子將納

之與之盟而遣之矣將師而從之諫言將以
師從二子蔡人聚將

執之辭曰失賊成軍而殺余何益乃釋之朝吳曰二三

子若能死亡則如違之以待所濟若求安定則如與之

以濟所欲

與蔡公

且違上何適而可

上謂蔡公

衆曰與之乃奉

蔡公召二子而盟于鄧依陳蔡人以國

國陳蔡而依之

楚公子

比公子黑肱公子棄疾蔓成然蔡朝吳帥陳蔡不羹許

葉之師因四族之徒

遠許蔡曼

以入楚及郊蔡公使湏務牟

與史痺先入因正僕人殺大子祿及公子罷敵公子比

爲王公子黑肱爲令尹次于魚陂

竟陵縣城西北有甘魚陂

公子棄

疾爲司馬先除王宮使觀從從師于乾谿而遂告之且

曰先歸復所後者剗師及訾梁而潰王聞羣公子之死

也自投于車下曰人之愛其子也亦如余乎侍者曰甚

焉小人老而無子知擠于溝壑矣王曰余殺人子多矣
能無及此乎右尹子革曰請待于郊以聽國人王曰衆
怒不可犯也曰若入於大都而乞師於諸侯王曰皆叛
矣曰若亡於諸侯以聽大國之圖君也王曰大福不再
祇取辱焉然丹乃歸于楚王汭夏將欲入鄢夏漢水別名順漢水
南至芋尹無宇之子申亥求王遇諸棘闥以歸夏五月
癸亥王縊于芋尹申亥氏○杜氏注乾谿在譙國城父
縣南東竟○公羊傳此弑其君其言歸何易也其易柰
何楚靈王爲無道作乾谿之臺三年不成百姓苦之諸

侯怨之公子棄疾主方城之外以君陳蔡脅比而立焉
然後令于乾谿之役曰比已立矣先歸者復其田里後
者剽衆潰而散靈王經而死劉氏改正又曰比之義宜乎效
死不立○蘇氏曰比將為君不曰楚比而曰公子比何
也比之歸非其謀也亂始於觀從而成於棄疾以比為
名而已比迫於觀從而以身許之以致處死則比雖不
弑而弑君之名比尸之矣比之歸也處猶在楚其不曰
入何也觀從召之蔡人與之楚人不拒則比之歸無難
也○胡氏傳或曰昭元年楚處弑立比出奔晉十三年

比歸而虔弑于棘圍則比未嘗一日北面事虔爲之臣
虔又弑立固非比之君矣而書曰比弑其君虔何也曰
凡去國出奔而君不以爲臣則晉於欒盈是也臣不以
爲君則公子鱄於衛衍是也若玄國雖久而爵祿有列
於朝出入有詔於國不掃其墳墓不收其田里不係累
其宗族即君臣之分猶在也比雖奔晉而晉人以羈待
比以國底祿固楚之亡公子也楚又未嘗錮之如晉之
於欒盈比又未嘗不向楚而坐如子鮮之於衛安得以
爲比非楚臣虔非比之君乎春秋書比弑其君虔明於

君臣之義也爲比者宜乎効死不立若國有所歸爲曹子臧魯叔肝不亦善乎今乃脅於勢而忘其守休於利而忘其義被之大惡欲辭而不可得矣爲人臣遭變事而不知其權者若此類是也悲夫聖人之垂戒明矣

楚子棄疾殺公子比

公羊殺
作弑

左氏傳觀從謂子干曰不殺棄疾雖得國猶受禍也子干曰余不忍也從曰人將忍子吾不忍侯也乃行國每夜駭曰王入矣乙卯夜棄疾使周走而呼曰王至矣國人大驚使蔓成然走告子干子皙曰王至矣國人殺君

司馬將來矣君若早自圖也可以無辱衆怒如水火焉
不可爲謀又有呼而走至者曰衆至矣二子皆自殺丙
辰棄疾即位○公羊傳大夫相殺稱人此其稱名氏以
弑何言將自是爲君也○襄陵許氏曰比已立矣其稱
公子何未能君其國也未能君其國則棄疾殺之猶殺
公子比爾曰公子比弑其君虔公子棄疾殺公子比此
代辭也非討辭也討賊稱人以殺○蘇氏曰不曰棄疾
而曰公子棄疾何也以親責之猶齊商人也趙氏曰不言棄疾之
殺其兄比亦殺兄
俱無骨肉之愛也○胡氏傳棄疾立比爲王而已爲司

馬固君比矣而殺之則宜書曰棄疾弑其君比而曰殺公子比何也初子干歸自晉觀從假棄疾命而召之來則來坎牲加書而強之盟則盟帥四族衆而使之入楚則入殺太子祿而立之爲王則王周走而呼於國中謂衆如水火而逼之自殺則自殺其行止遲速去就死生皆觀從與國人所爲而比未嘗可否之也安得爲棄疾之君乎然比兄也黑肱弟棄疾其季弟也立比爲王肱爲令尹疾爲司馬蓋國人以長幼之序立之也則宜書曰楚人殺比而春秋變文歸罪棄疾者誅其本意在於

代北而非討之也所謂輕重之權衡曲直之繩墨而懷惡者亦無所隱其情矣

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘

左氏傳晉成虺祁諸侯朝而歸者皆有貳心成虺祁在八年爲

取鄭故年在十晉將以諸侯來討叔向曰諸侯不可以不

示威知晉德薄欲以威服之乃並徵會告于吳秋晉侯會吳子于

良水道不可吳子辭乃還七月丙寅治兵于邾南革車

四千乘三十萬人遂合諸侯于平丘晉人將尋盟齊人不可

晉侯使叔向告劉獻公曰抑齊人不盟若之何對曰盟以底信君苟有信諸侯不貳何患焉告之以文辭董之以武師雖齊不許君庸多矣天子之老請帥王賦元戎十乘以先啓行遲速唯君

言將爲晉討齊

叔向告于齊曰諸侯

求盟已在此矣今君弗利寡君以爲請對曰諸侯討貳

則有尋盟若皆用命何盟之尋叔向曰國家之敗有事

而無業事則不經有業而無禮經則不序有禮而無威

序則不共有威而不昭共則不明不明棄共百事不終

所由傾覆也

業貢賦之業須禮而次序禮須威嚴而後共威須昭告神明而後信義著信義不明

則并威不威并禮無禮無經
無經無業故百事不成也
是故明王之制使諸侯歲

聘以志業
歲聘以備其職業
問朝以講禮
三年而一朝正班爵帥長幼
再朝

而會以示威
六年而一會以訓上下
再會而盟以顯昭明
十二年一盟以

昭信義王巡守盟于方嶽之下
志業於好講禮於等示威於衆昭明於

神自古以來未之或失也存亡之道恒由是興晉禮主

盟懼有不治奉承齊犧而布諸君求終事也君曰余必

廢之何齊之有唯君圖之寡君聞命矣齊人懼對曰小

國言之大國制之敢不聽從叔向曰諸侯有間矣不可

以不示衆八月辛未治兵建而不旆
建立旌旗不曳其旆旆游也
壬

申復旆之諸侯畏之○杜氏注平丘在長垣縣西南○
胡氏傳方是時楚人暴橫陵蔑中華在宋之盟爭晉先
軟及虢之會仍讀舊書遂召諸侯爲申之會遷賴於鄢
縣陳滅蔡此乃敵國外患臨深履薄恐懼省戒之時其
君當倚於法家拂士以德脩國政其臣當急於責難陳
善以禮格君心內結夏盟外攘夷狄復悼公之業若弗
暇也今乃安於不競無憤恥自強之志惟宮室臺榭是
崇是飾及諸侯皆貳顧欲示威徵會而以兵甲耀之不
亦末乎春秋之法制治于未亂保邦于未危貴事之預

恥以苟成而不要諸道者也是以深惡此會如下文所

貶去

石氏曰楚重合諸侯于申中國諸侯不復出者踰十年晉今乘楚之亂會諸侯于平丘乃不務以德懷遠近而治兵鄰南矜其事以示諸侯威其亦異乎桓文之舉矣宜其不復振也

八月甲戌同盟于平丘公不與盟

陸氏纂例趙子曰甲戌穀梁作庚戌

左氏傳邾人莒人愬于晉曰魯朝夕伐我幾亡矣我之不共魯故之以晉侯不見公使叔向來辭曰諸侯將以甲戌盟寡君知不得事君矣請君無勤子服惠伯對曰君信蠻夷之詐以絕兄弟之國棄周公之後亦唯君寡君聞命矣叔向曰寡君有甲車四千乘在雖以無道行

之必可畏也况其率道其何敵之有牛雖瘠饋於豚上
其畏不死南蒯子仲之憂其庸可棄乎若奉晉之衆用
諸侯之師因邾莒杞鄆之怒以討魯罪間其二憂何求
而不克魯人懼聽命甲戌同盟于平丘晉人執季孫意
如以歸子服湫從義三十一年春穆叔至自晉見孟孝
伯語之曰趙孟將死矣其語偷若趙
孟死為政者其韓子乎吾子盍與季孫言之可以樹善
君子也晉君將失政矣若不樹焉使早備魯既而政在
大夫韓子懦弱大夫多貪求欲無厭齊楚未足與也魯
其懼哉又與季孫語晉故季孫不從及趙文子卒晉公
室卑政在侈家韓宣子為政不能圖諸侯魯不堪晉求
讒慝弘多是以有平丘之會○杜氏曰邾魯同好又未
嘗朝夕伐言晉人無故
信之所謂讒慝弘多也○泰山孫氏曰自宋之會諸侯

不出大夫專盟會者十年至申之會則又甚矣楚子以蠻夷之衆橫行中國戕滅陳蔡以厭其欲諸侯莫敢抗楚子專盟會者又十年矣今晉昭乘楚靈弑逆之禍與劉子合諸侯同盟于訾所爲哉此固不足道也故自是訖會召陵諸侯復不出者二十四年至如鄆陵之會晉自不出此不足宗諸侯可知也○蘇氏曰諸侯方貳晉齊人不欲盟要之乃可故書同盟有不同者故也○程氏傳楚棄疾立諸侯懼之故同盟公不與盟晉罪公使不與盟雖欲辱公然得不與同盟之罪實爲幸也○胡氏

傳會與盟同地再書平丘者書之重詞之複其間必有
美惡焉再書平丘惡之也其惡之何也主盟中國而矜
威力迫諸侯信夷訴以絕兄弟逞私憤間憂疑詞繁而
不殺惡其競力不道爲後世鑒也○杜氏注公不與盟
非國惡故不諱○胡氏傳臣子之於君父隱諱其恥禮
也十二國會于平丘公獨見辭不得與盟斯亦可恥矣
直書其事而不隱何也晉主此盟德則不競矜兵甲之
威肆脅持之術以諸侯要天子之老而歃血以中國同
惴夷狄篡立之主而結盟無禮義忠信誠懇之心而以

威詐莅之具此五不韙者得不與焉幸也聖人筆削春秋凡魯君可恥者必爲之隱諱至會于沙隨而公不得見盟于平丘而公不得與衆人常情必深沮喪以爲辱矣仲尼推明其故自反而縮雖晉國之嚴不可及也彼以其威我以其理彼以其勢我以其義夫何歉乎哉直書其事示後世立身行己之道也其垂訓之用大矣晉人執季孫意如以歸

胡氏傳稱人以執非伯討也自文公以來公室微弱三家專魯而季氏罪之首也宿及意如尤爲強逼元年伐

宮疆鄆十年伐宮取鄆中分魯國以自封植而使其君
民食於家不臣甚矣何以爲非伯討乎晉人若按宮邾
有無之狀究南蒯子仲奔叛之因告於諸侯以其罪執
之請於天子以大義廢之選於魯卿更意如之位收歛
私邑爲公室之民使政令在君三家臣順則方伯之職
修矣今魯與邾通好初未有朝夕伐宮而鄆鄆之役又
非昭公意也徒以邾宮之言曰我之不共魯故之以遂
辭魯君而執意如則是意在貨財而不責其無君臣之
義也何得爲伯討乎稱人以執罪晉之偷也

公至自會

蔡侯廬歸于蔡陳侯吳歸于陳

左氏傳楚之滅蔡也靈王遷許胡沈道房申於荆焉平

王即位既封陳蔡而皆復之

城蔡在十二年許胡沈小國也道房申皆故諸侯楚

城以爲邑荆荆山也汝南有吳防縣即防國

隱大子之子廬歸于蔡悼大子

之子吳歸于陳○公羊傳此皆滅國也其言歸何不與

諸侯專封也

故使若有國者自歸者也○泰山孫氏曰楚靈滅之楚平既立將矯楚靈之惡以說

中國也故復二國之後然則楚城之楚平復之善與非善也聖王不作諸侯不振二國之命制在夷狄故也孔子以陳蔡自歸爲文所以強夷而存中國也○常山劉氏曰陳蔡者先王之國非楚可滅非楚可復也

故書爵歸言二國之嗣位其所固有國其所宜歸也○胡氏傳棄疾封之可謂有奉矣不言自楚者不與楚子之得封也

○常山劉氏曰二君名者素非諸侯至此始立也

○胡氏傳陳列聖之後蔡王室之親見滅於楚虔而諸侯不能救復封於棄疾而諸侯不能與是以夷狄制諸夏也聖人至是懼之甚舊有不得已焉制春秋爲後法大要皆天子之事也其義則以公天下爲心興滅國繼絕世異於自私其身欲擅而有之者故書法如此爲天下國家而不封建欲望先王之治難矣

冬十月葬蔡靈公

左氏傳葬蔡靈公禮也

穀梁傳變之不葬有三矣德不葬弑君不葬滅國不葬然且葬

之不與楚滅也

○陸氏纂例國復乃葬凡三十一月

公如晉至河乃復

左氏傳公如晉荀吳謂韓宣子曰諸侯相朝講舊好也執其卿而朝其君有不好焉不如辭之乃使士景伯辭公于河

吳滅州來

左氏傳吳滅州來楚令尹子期請伐吳王弗許曰吾未撫人民未事鬼神未修守備未定國家而用民力敗不

可悔州來在吳猶在楚也子姑待之○泰山孫氏曰州

來附庸

蘇氏曰楚之附庸

春秋卷第二十二